

边裔典

邊裔典第二十四卷

朝鮮部彙考十二

明二

憲宗成化元年朝鮮貢使道卒命給棺賜祭及綵幣 按明外史朝鮮傳天順八年遣使頒卽位詔成化元年冬陪臣李門炯來朝卒於道命給棺賜祭并綵幣慰其家時朝鮮頻貢異物

成化四年朝鮮王瑒卒賜諡惠莊封世子晄爲國王以御史侯英奏定冊封大禮選廷臣有學行者充正副使 按明外史朝鮮傳成化四年正月遣官來獻俘詔從厚資敕獎諭之是年瑒卒遣太監沈繪弔祭賜諡惠莊遣太監鄭同崔安封世子晄爲王給妃韓氏誥命旣行巡按遼東御史侯英奏曰遼東連年被寇瘡痍未起今復禾稼不登軍民乏食太監鄭同等隨從人員所過驛驛勞費臣考先年曾於翰林院中選有學行文望者出使今同安俱朝鮮人墳墓宗族皆在見其國王不免屈節殊褻中國體乞寢成命或翰林院或給事中及行人內推選一員往使爲便帝曰英所言良是自後賞資遣內臣其冊封大禮選廷臣有學行者充正副使

成化六年朝鮮王暉卒賜諡襄悼命故世子暉之子斐嗣位 按明外史朝鮮傳成化六年暉病篤以所生子幼命其兄故世子暉之子斐權國事遣陪臣以聞及卒令內官往弔祭賜諡襄悼命斐嗣位斐妻韓氏封王妃

成化十年追贈斐父世子暉爲國王諡懷簡以韓氏爲王妃從所請也 按明外史朝鮮傳云云

成化十一年十一月以冊立皇太子遣官齋詔賜王及妃綵段文錦 按明外史朝鮮傳云云

成化十二年朝鮮王斐爲繼妻請誥命 按明外史朝鮮傳成化十二年十月斐爲繼妻尹氏請封賜誥命冠服

成化十三年詔許朝鮮使臣回得買弓面一百副 按明外史朝鮮傳時禁外國互市兵器十三年斐奏小邦北連野人南鄰倭島五兵之用不可缺一而弓材所需牛角仰於上國高皇帝時嘗賜火藥火砲今望特許收買弓角不與外蕃同禁兵部議歲市弓角五十後以不足於用請無限額詔許倍市

成化十六年朝鮮請改貢道不許 按全遼志成化十六年請改貢道朝議以爲由遼陽經廣寧過

前屯而後入山海關迂回三四大鎮自有微意自鴨綠江抵前屯山海路太徑恐貽後日憂遂不從其請

成化十七年妾奏繼妃尹氏失德廢置乞更封副室尹氏從之

成化十九年四月封妾長子懽爲世子

孝宗弘治五年立皇太子頒詔於其國

弘治七年十二月妾卒 按以上明外史朝鮮傳云云

弘治八年賜朝鮮王妾諡康靖封世子懽爲國王 按明外史朝鮮傳弘治八年春懽遣使告訃且請諡賜妾諡康靖四月命中官偕行人封懽爲國王妻慎氏爲王妃賜誥命冕服綵幣

弘治十二年朝鮮王懽奏請搜捕海島逃人報可 按明外史朝鮮傳弘治十二年懽奏本國人屢有違禁匿海島誘引軍民漸至滋蔓乞許本國自行搜刷其係上國地方請敕官追捕時遼東守臣亦奏如懽言報可

弘治十五年冬命中官封懽長子顥爲世子

弘治十八年八月遣官頒卽位詔十月愷遣使進香另貢方物馬匹賀卽位 按以上明外史朝鮮傳云云

武宗正德二年朝鮮王愷以疾辭位封其弟懌爲國王 按明外史朝鮮傳正德二年愷以世子顓天囚哀慟成疾奏請以國事付其弟懌其國人復奏請封懌禮部議命懌權理國事俟愷卒乃册封旣陪臣盧公弼等以朝貢至京復請封懌廷議不允十二月愷母妃奏懌長且賢堪付重寄於是禮部奏愷以病疾辭位懌以親弟承托授受旣朋友愛不失通國臣民舉無異詞宜順其請上乃允懌嗣位遣中官敕封并賜其妃尹氏誥命初高麗國王王氏洪武間王顓遇弑無後權臣李仁任立僞姓爲嗣後國人得王氏裔瑤立之瑤昏亂衆推門下侍中李成桂主國事請於朝許之改名旦更國號曰朝鮮成桂與仁任本異族永樂間降祭海嶽祝文稱成桂爲仁任子而祖訓亦載仁任子成桂更名旦後成桂子芳遠奏辨太宗許令改正至是修大明會典仍列祖訓於朝鮮國下貢使市以歸正德十四年朝鮮王懌奏乞改正世系詔可 按明外史朝鮮傳正德十四年懌上疏備陳世系辨先世無弑逆事乞改正禮部議會典詳載本朝制度事涉外國疑似之際在所略況成桂得國出皇

祖命其不繫仁任後太宗詔可徵宜從其請詔曰可

正德十五年封朝鮮王懌子崐爲世子 按明外史朝鮮傳正德十五年冬命內官封懌子崐爲世子賜懌金帛珠玉令括取異物及童男女以進

正德十六年世宗卽位召使朝鮮內臣還毋有所索取 按明外史朝鮮傳正德十六年世宗卽位禮官言天子初踐阼宜正中國之體絕外裔狎侮之端請諭懌召內臣還毋有所索取帝從之八月懌遣陪臣賀卽位

世宗嘉靖二年朝鮮獻倭俘并送還中國被掠人 按明外史朝鮮傳嘉靖二年八月懌以俘獲倭夷二人及斬三十三人來獻并送還中國被掠八人帝嘉其忠賜白金錦紵

嘉靖八年朝鮮臣柳溥上言朝鮮王李旦世系 按明外史朝鮮傳嘉靖八年八月陪臣柳溥上言國祖李旦係本國全州人二十八世祖瀚仕新羅爲司空新羅亡六世孫兢休入高麗十三世孫安社仕元爲南京千戶所達魯花赤元季兵興安社曾孫子春與男成桂避地東遷至正辛丑當恭愍王之十年有紅巾賊入境成桂擊賊有功授武班職事時尙未知名恭愍無嗣陰畜寵臣辛旽之子

禍爲子晚被嬖臣洪倫內豎崔萬生所弑權臣李仁任誅倫萬生而立禍擢成桂爲門下侍中禍遣兵侵遼東成桂不從返兵禍懼遜位於子昌昌以僞姓見黜復立王氏裔定昌君瑤竄仁伍於外瑤復不道國人戴成桂請於高皇帝立爲王更名旦瞻瑤別邸終其身實未嘗爲弑前永樂正德間屢經奏請俱蒙俞允而迄未改正今遇重修會典乞賜昭雪禮部爲請帝許之詔送史館編纂

按春明夢餘錄嘉靖八年朝鮮國陪臣吏曹叅判柳溥等呈言本國祖考不係李仁任之後而皇明祖訓及大明會典所載俱屬仁任已於永樂及正德間奏請改正俱蒙俞允迄今尙未行今幸重修會典乞爲改正禮部以請上許之詔開送史館纂輯據所陳建國始末言旦初名成桂其先本國全州人二十八世祖瀚仕新羅爲司空新羅亡瀚六世孫兢休入高麗十三世孫安社仕元爲南京五千戶所達魯花赤世襲其職元季兵興安社曾孫與男成桂遊地東遷至元辛丑當高麗恭愍王之十年有紅巾賊二十萬衆入境成桂領兵剿賊有功授武班職事恭愍無嗣陰畜寵臣辛旽之子禍爲己子晚多躁暴爲嬖臣洪倫等所弑權臣李仁任車裂倫等於市立禍爲嗣其子昌爲世子禍於六年擢成桂爲門下侍中禍遣將犯遼東成桂爲副將行至鴨綠江與諸將議不宜得罪於上國禍

懼遜位於昌以洪武二十二年宣諭以僞姓見黜而復王氏之裔定昌君瑤主國事仁任罪竄於外
既王瑤又不義國人憤怨乃共廢瑤推立成桂成桂請命於高皇帝乃命成桂爲王國號朝鮮改名
旦云又考其國史當元盛時其元孝王者已遷居江華島元無如之何但責其不登陸而已竟臣服
於元而終不登陸至其子順孝王親迎公主以元服同輦入國觀者駭愕時從行宗宰不開剃王責
之至其子忠烈王則宰相至下僚無不開剃唯禁內學館不剃左承旨朴恒呼執事官諭之於是學
生皆剃

嘉靖十三年詔定高麗正使通事一員陪侍出入隨從人仍照前禁拘 按春明夢餘錄嘉靖十三
年閏二月初九日禮部題使臣出入疏據提督會同館主事張鏊呈據朝鮮國使臣蘇洗讓等呈前
事竊照本國粗識禮義至誠事大朝廷待遇有同內服凡本國使臣到京自行出入不見防範迄至
於今百有餘年敬謹彌篤別無違異近年以來始加拘禁鎖閉館門遇有稟奉公幹只許通事一二
員刻其出入著令館帶牌管押有碍舊式查得成化六年二月間本國陪臣權減等赴京時分禮部
發到榜文該奉聖旨會同館安歇一應朝貢四夷使客出入舊有禁例今後不許無故往來街市該

衙門知道欽此本月十一日武都督等到會同館宣諭聖旨因通行禁鎖將朝鮮使臣并禁令後依舊出入卽令撤去榜文又該弘治十三年五月間有會同館安歇女直旱哈殺死一般夷人兵部奉聖旨備由出榜曉諭朝貢夷人著令在館不許出入并本國一體防禁禮部主事劉綱陳言奏本查得先該本部見行事例朝鮮素守禮義敬事朝廷比與他夷不同進貢人員事例出入原無防禁近該兵部等衙門會議禁約將前項事例一概革去以致提督官員嚴加拘禁不得出入合無仍照前項舊例朝鮮人員令其自行貨賣深爲便益奉聖旨是欽此本國使臣出入自由無有防禁在嘉靖初年主客孫郎中無緣拘禁不許出入至嘉靖四年八月內有陪臣鄭允謙等前赴京師將前項節奏欽依事理告要照舊自行出入蒙部告准查得舊例許令自行出入已經本館移文知會去後有提督陳主事執己不遵迫束愈嚴久莫申省貽此因循遠人慕義之望殊用慨然所以區區陳瀆不能自默者豈是意在買賣以圖復舊哉其拘閉與否亦非有他虧益祇以一視之仁罔有內外使之觀游無間光瞻禮儀考質文物薰炙遷化大有開益此實敦懷柔之至德獎事大之盡誠俾我遐服永荷寵靈綿歷萬世與之匹休爾在先本國使臣人等入貢到市當飭下人務令循度猶恐或有非

違十分畏謹卽自禁制嚴密比前尤甚在館防閑有似囚繫非唯有違舊行之規恐非累朝優待之意伏乞照依舊例許自出入以示聖朝優容之典不勝幸甚等因查得朝鮮國使臣素守禮義節年慶賀到京本部查照舊例待遇以禮於國子監等處聽令謁拜於一應貨賣聽其自便近年以來止因遠方裔使跟隨人役多生事端該管官員始行一槩約束加嚴而使臣頗閑禮義委於他處裔使不同朝廷自來待遇以禮出入不防具有舊例所據蘇沈讓等具呈前事相應議處其呈稱欲觀遊無間光瞻禮義考質文物薰炙遷化固見其仰慕上國之誠但遠人言服既殊易罹國禁亦須曲爲之處合候命下每五日一次許令該國正使及書狀官人等出館於附近市衢觀遊本部仍劄付空閑通事一員陪侍出入以示禮待防衛之意其隨從人仍行照前拘禁不許擅自出入庶幾不拂遠人之情不廢上國之法矣

嘉靖十五年十一月皇太子生遣官頒詔懌奉表賀

嘉靖十六年八月以更新廟制上兩宮徽號表賀貢方物及馬 按以上明外史朝鮮傳云云

嘉靖十八年睿宗祔廟立皇太子朝鮮王懌俱表賀 按明外史朝鮮傳嘉靖十八年二月睿宗獻

皇帝祔太廟配享明堂禮成懌表賀帝特御奉天門引見賜宴禮部五月上皇天大號皇祖諡號禮成六月立皇太子懌俱表賀

嘉靖二十三年冬朝鮮王懌卒 按明外史朝鮮傳云云

嘉靖二十四年立朝鮮王懌子嵵嵵未踰年卒立嵵弟暉爲國王暉捕海上姦民以獻 按明外史朝鮮傳嘉靖二十四年正月來訃賜懌諡恭僖詔立其子嵵嵵未踰年卒賜諡榮靖九月權國事嵵弟暉遣使謝祭諡并請襲封詔許之 按蒼霞草嘉靖二十三年懌卒子嵵嗣未踰年卒弟暉嗣

時日本入寇舟漂至朝鮮及姦民往來海上私與倭市暉輒捕以獻上亦厚賜予答其意

嘉靖二十五年朝鮮王暉遣使送下海番人六百餘至邊賜金幣 按明外史朝鮮傳云云

嘉靖二十六年以沿海奸民爲外國所獲嚴敕海道官員 按明外史朝鮮傳嘉靖二十六年正月

暉咨稱福建人從無泛海至本國者因往日本市易爲風所漂前後共獲千人以上皆挾帶軍器貨物恐起兵端詔頃年沿海姦民犯禁福建尤甚往往爲外國所獲有傷國體海道官員令巡按御史

察叅仍賜王銀幣以旌其忠

嘉靖三十一年冬暉以洪武永樂間所賜樂器敝壞奏求律管更乞遣樂官赴京校習許之

嘉靖三十二年十一月俘倭夷三人來獻賜銀幣 按以上明外史朝鮮傳云云

嘉靖三十五年朝鮮王暉歸我俘賜璽書褒諭 按明外史朝鮮傳嘉靖三十五年五月有倭船四

自浙直敗還漂入朝鮮境暉遣兵擊殲之得中國被擄及助逆者三十餘人因賀冬至節帝以歸我
俘賜璽書褒諭

嘉靖三十六年朝鮮王暉奏請補給恭僖王妃及榮靖王妃誥命 按明外史朝鮮傳嘉靖三十六
年冬暉奏臣母恭僖王繼妃尹氏臣嫂榮靖王妃朴氏誥命被燬乞補給詔允所請

嘉靖三十八年朝鮮獲招通倭寇陳得等以獻 按明外史朝鮮傳嘉靖三十八年十一月暉奏今
年五月有倭寇駕船二十五隻來抵海岸臣命將李鐸等勦殺殆盡獲中國民陳春等三百餘人內
招通倭鄉導陳得等十六人俱獻闕下復降敕獎勵厚資銀幣并賜鐸等有差

嘉靖四十二年朝鮮王暉乞著始祖旦父子春之名於會典 按明外史朝鮮傳嘉靖四十二年九
月暉復上書辨先世非李仁任後今修會典雖蒙釐正乞著始祖旦父子春之名帝令附錄會典

穆宗隆慶元年朝鮮王暉卒賜諡恭憲封其姪李昖爲國王 按明外史朝鮮傳隆慶元年遣官頒

卽位詔賜王及妃紵絲文錦綵絹時帝幸太學來使乞留觀禮許之是年冬暉卒遣官弔祭賜諡恭

憲命其姪李昖襲封

按蒼霞草隆慶元年暉卒從子昖嗣李氏自成桂以來事朝廷恭歲時朝

貢外慶慰報謝無常期行李踵於道王嗣立則使者往封有大事則頒詔其國他夷不敢望也始成

桂立高皇帝雖置不問然心惡其篡而傳者復以成桂爲仁任子故祖訓謂其父子先後弑王氏四

王其後嗣當永樂正德嘉靖間累表自白言恭愍之弑由嬖臣倫仁任誅倫立禍禍旣立則遣兵侵

遼東先臣成桂懼干上國返其兵禍遂遜位於子昌而恭愍妃安氏以禍昌皆非王氏不當立乃黜

昌立瑤瑤復不道國人請命高皇帝立先臣瞻瑤別邸終其身先臣實未嘗爲弑而虛蒙此聲又家

世出新羅司空故以爲仁任子皆冤甚乞下史館昭雪之今上初乃得請其地東西相距二千里南

北四千里分八道統府州郡縣其設官略倣中國以田制俸刑法不苛俗柔謹崇釋尙鬼惡殺茅居

苧衣知文字喜讀書上下威儀燦然可觀山川丸都神嵩北岳海鴨綠江爲大產金銀鐵水晶鹽紬

苧布白礬紙狼尾筆果下馬長尾鷄貂獬海豹皮八稍魚昆布杭黍麻榛松人參茯苓其貢道由鴨

綠江歷遼陽廣寧入山海關達京師

隆慶七年八月遣官頒卽位詔賜王及妃幣帛文綺

神宗萬曆元年正月上穆宗尊諡兩宮徽號禮成肅表賀獻方物馬匹

萬曆十年九月皇太子生遣官頒詔賜王及妃錦幣 按以上明外史朝鮮傳云云

萬曆十五年朝鮮王肅上表謝罪敕獎之 按明外史朝鮮傳萬曆十五年六月肅以前陪臣南館

失火及貢物被盜二事上表謝罪敕獎其恪順

萬曆十六年以會典賜朝鮮 按明外史朝鮮傳肅慶請皇明會典爲其先康獻王旦雪冤十六年

正月會典成適貢使愈泓在京請給前書以終前命許之

萬曆十七年朝鮮臣奏所收琉球國船合解京放歸從之 按明外史朝鮮傳萬曆十七年十一月

陪臣奇岑等入賀冬至奏稱本年六月大琉球國船遭風至海岸所有男婦合解京給文放歸從之

萬曆十九年以朝鮮王肅奏詔兵部申飭海防 按明外史朝鮮傳萬曆十九年十一月肅奏倭酋

關白平秀吉聲言明年三月來犯詔兵部申飭海防平秀吉者薩摩州人初隨倭關白信長信長任

用之會信長被其下所弑秀吉遂統信長兵自號關白刼降六十餘州朝鮮與日本對馬島相望時有倭夷往來互市

萬曆二十年倭犯朝鮮朝鮮王昞棄城奔以次子琿攝國事廷議出師援之按明外史朝鮮傳萬曆二十年五月秀吉遂分渠帥行長清正等率舟師數百艘逼釜山鎮潛渡臨津分陷豐德諸郡時朝鮮承平久兵不習戰昞酒酒弛備猝島夷作難望風皆潰昞棄王城令次子琿攝國事奔平壤已復走義州願內屬七月兵部議令駐劄險害以待天兵號召通國勤王以圖恢復而是時倭已入王京毀墳墓刼王子陪臣剽府庫八道幾盡沒旦暮且渡鴨綠江請援之使絡繹於道廷議以朝鮮爲國藩籬在所必爭遣行人薛潘諭昞以興復大義揚言大兵十萬且至而倭業抵平壤朝鮮君臣益急出避愛州遊擊史儒等率師至平壤儒戰死副總兵祖承訓統兵渡鴨綠江援之僅以身免中朝震動以宋應昌爲經略八月倭入豐德等郡兵部尙書石星計無所出議遣人偵探之於是嘉興人沈惟敬應募惟敬者市中無賴也是時秀吉次對馬島分其將行長等守要害爲聲援惟敬至平壤執禮甚卑行長給曰天朝幸按兵不動我不久當還以大同江爲界平壤以西盡屬朝鮮耳惟敬以

聞廷議倭詐未可信乃趣應昌等進兵而星頗惑於惟敬乃題署遊擊赴軍前且請金行間十二月以李如松爲東征提督

萬曆二十一年東征提督李如松大捷於平壤朝鮮王表謝敕朝鮮當自爲守 按明外史朝鮮傳

萬曆二十一年正月如松督諸將進戰大捷於平壤行長渡大同江遁還龍山所失黃海平安京畿江源四道並復清正亦遁還王京如松旣勝輕騎趨碧蹄館敗退駐開城初如松誓師欲斬惟敬以參軍李應誠言而止至是敗氣縮而應昌急圖成功倭亦乏食有歸志因而封貢之議起應昌得倭報惟敬書乃令遊擊周弘謨同惟敬往諭倭獻王京返王子如約縱歸倭果於四月棄王城遁時漢江以南千有餘里朝鮮故土復定兵部言宜令王還國居守我各鎮兵久疲海外以次撤歸爲便詔可應昌疏稱釜山雖瀕南海猶朝鮮境有如倭覘我罷兵突入再犯朝鮮不支前功盡棄今撥兵協守爲第一策卽議撤宜少需俟倭盡歸量留防戍部議留江浙兵五千分屯要害仍諭貽蒐練軍實毋恃外援已而沈惟敬歸自釜山同倭使來請款而倭隨犯咸安晉州逼全羅聲復漢江以南以王京漢江爲界如松計全羅饒沃南原府尤其咽喉乃命李平胡祖大受鎮南原祖承訓李寧移南陽

劉綎移陝州已倭果分犯我師並有斬獲兵科給事中張輔之謂倭聚釜山原佯退誘我撤兵圖漸逞無故請貢非人情今猝犯晉州情形已露宜節制征剿遼東都御史趙耀亦報欸貢不可輕受七月倭從釜山移西生浦送回王子陪臣時師久暴露聞撤勢難久羈應昌請留劉綎川兵吳惟忠駱尙志等南兵合薊遼兵共萬六千聽綎分布慶尙之大兵月餉五萬兩資之戶兵二部先是發帑給軍費已累百萬廷臣言虛內實外非長策請以所留川兵命綎訓練兵餉令本國自辦於是詔撤惟忠等兵止留綎兵防守諭朝鮮世子臨海君琿居全慶以顧養謙爲經略九月昫以三都旣復疆域再造上表謝恩然時倭猶據釜山也星益一意主欸兵部主事曾偉芳言倭欸亦去不欸亦去欸亦來不欸亦來蓋關白大眾已還行長留待知我兵未撤不敢以一矢加遺欲歸報關白捲土重來則風不利正苦冬寒故曰欸亦去不欸亦去沈惟敬前倭營講購而咸安晉州隨陷今欲恃欸冀來年不攻則速之欸者正速之來也故曰欸亦來不欸亦來宜令朝鮮自爲守弔死問孤練兵積粟以圖自強帝以爲然因敕諭昫者甚至

萬曆二十二年倭部小西飛入朝要以誓無犯朝鮮詔關白准日本王號授行長都督僉事 按明